



Inatsisartunut qinersisarnermi qinersiviit amerlanerulersinneqarnissaat anguniarlugu Inatsisartunut qinersisarnermi inatsisip allanngortinnissaa pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartuni Siumup gruppe)

Matumani siunnersuummi Siumut-miit saqqummiunneqartumi pineqarput Inatsisartunut qinersinermut tunngasut marluk. Siullermik qinersiviit atulersikkusunneqarput aappaatullu allanngortikkusunneqarpoq nunatsinnut nuuttut qaqugu qinersisinnaatitaanissaat. Kingulleq oqaaseqarfigeqqaalaassavara:

Naatsumik oqaatigalugu nunami maani innuttaasut qinersisinnaatitaanerat Siumup atorunnaarsinniarppaa. Ullumikkut imaappoq taasisinnaatitaasoqartarluni qinersisinnaangortoqartarlunilu ukiup affaa nunami maani najuqareersimangaanni. Demokraatini isumaqarpugut inissaminiittoq nunami maani kikkut tamat oqartussaaqataanerannut tunngatillugu nunagisami aamma akileraarfigisartakkami pisinnaatitaaffeqarnissaq.

Siumup tamanna allanngortinniarppaa aatsaat taasisoqarsinnaalersinniarlugu qinersisoqarsinnaangortinniarlugulu ukiut marluk arfineq-marlullu akornanni innuttaasut najuqareersimappata. Siunnersuut kikkut tamat oqartussaaqataanerannut akerliuvoq aamma qujatsuitulliorneruvoq. Inuit akileraarutaat perusuppasi kikkulli tamat oqartussaaqataanerannut atatillugu pisinnaatitaaffeqartikkusunngilasi. Paasissaanngilasi. Ileqqorlunneruvoq eqqarsarluannginnerullunilu, Demokraatini neriutigaarput uaguinnaanngitsoq aammali allat eqqarsaatit taamaattut itigartikkumaaraat. Atorfissaqanngillat nunami kikkut tamat oqartussaaqataanerat tunngavigalugu ingerlasumi.

Qinersiviit iserfigilaassavakka. USA qivialaariartigu, taakkua qinersiviit atorpaat/valgkreds. Tassani præsidientiat ateqarpoq Donald Trump. Tassani inissisimavoq amerikami qinerseriaaseq pissutaalluni Taasinerit tamarmik assigiimmik naleqartinneqarsimasuuppata taava præsidenti ateqarsimassagaluarpog Hillary Clinton, nuna tamakkerlugu amerlanerpaanik taaneqarami.

Nunami maani Demokraatiniit isumarput naapertorlugu qinerseriaaseq pitsaanerppaaq atorparput, nunarpummi tamarmi qinersivittut ataasiugami. Taasinerit kisinneqareeraangata ilaasortassat agguarneqartarput partiit amerlanerpaanik qinerneqarsimasut amerlanerpaanik isertitaqartarlutik aamma tamatuma kingorna partiini ataasiakkaani qinerneqarnerpaat ilaasortanngortarput. Pisariitsuvoq, paasiuminarpoq aammalu minnerunngitsumik kikkut tamat oqartussaaqataanerat ataqineqarpoq. Siumut allatut isumaqarpoq. Pissutaagunarpoq partiip ilisimammagu qinersisoqangajalersoq. Qinersiveqarluni periuseq atoraanni taava naliginnaavoq partiit angisuut Siumut Inuit Ataqatigiillu-



iluaquserneqarnerusarnerat. Ajournerpaatut taarusutara aana, Siumut isertunngimmalluunniit qinersivinnik pilersitserusunermut pissutaamat Siumut qinerneqarnerunissaa. Partiip nammineq tamanna nassuerutigaa KNR TV-p aallakaatitaani Isummorsorfimmi. Taamatut politikkimut aallaaveqarneq Demokraatiniit kusanaalluinnartutut isigaarput, qatsunnarsivoq maani inersuarmi imminnut sullittut. Politikki imaanngilaq allat akigalugit imminut iluaquserniarnissaq - tunngaviuvoq inuiaqatigiit sapinngisamik pitsaanerpaat amerlanerpaanut pilersinnissaat. Ajoraluartumilli tupigusuallanngilagulluunniit. Maanimi ataatsimiinnermi siunnersuutit arlaqarput partiinut iluaqusiinernut tunngasut. Politikerit ilaqaasa akeqanngitsumik angalasalernissaannut siunnersuutigineqartoq assersuutissatsialaavoq, qujanartumik tunuartinneqarpoq. Alla assersuutissaq tassaavoq partiinut tapiissutinik qaffaarusunneq. Mannalu amerlanerusunik qinersiveqalernissamut siunnersuut aamma saqqummiunneqarpoq.

Isummorsorfimmi nassuerneq eqqaassanngikkaanni, Siumup siunnersuutini kusanarnerpaanngorlugu saqqummiunniarsaraa.

Tunngavilersuutigineqarput nunami maani kikkut tamarmik sinniisoqartariaqartut aammalu kikkut tamarmik tusaaneqartariaqartut. Siumumi politikkerit qineqqusaarutigisuuppasuk najukkaminni kommuniminniluunniit pissutsit pitsaanngorsarusullugit taava sassarsimassapput qinersinermut kukkusumut. Inatsisartuni nuna tamarmi sullinneqartussaavoq nunami immikkoortukkuutaat pinnagit. Najukkamik pingaarnersiulluni (lokalpatriotisme) qineqqusaartarneq qimattariaqarparpoq sulissullugulu nuna tamakkerlugu.

Meeraq ataasinguarluunniit pitsaanerusumik atugaqalerpat taava nunatsinnut ataasiusumut pitsaasuusaaq nunap immikkoortuaannaanuunngitsoq. Ilulissani timmisartunut suluusalinnut mittarfimmik sanasoqartussaamat Ilulissat kisimi iluaquserneqarnaviannngilaq, inuiaqatigiilli tamarmik iluaquserneqassapput. Nuna tamakkerlugu politikkerinnermi taamatut eqqarsartoqartussaavoq. Taamaallaat eqqarsaatigineqartussaannngilaq aggerfik qanoq iluaquserneqassanersoq. Taamaassimappat kommunalbestyrelsimut nunaqarfinniluunniit aqutsisunut sassartoqassaaq. Inatsisartuni sulineq tassaavoq, nuna tamakkerlugu sulineq.

Qinersiviliornikkut partiit aaliangersimasunut iluaquserneqassapput matumani Siumut IA-lu - aamma Inatsisartunut qinersinissaq malunnartumik sunniuteqarfigissavaat. Sumiluunniit qinersivilioraluaaraanni taava partiit annerit tamatigut iluaquserneqartassapput minnerit akigalugit. Aamma partiit annerit amerlanerusunik isertitaqassapput maannakkut periutsimut atorineqartumut naleqqiullugu.

Atagu kommunit ataasiakkaat qivialaartigut innuttaasalu amerlassusaat qiviarlugit, siunnersuutigineqartumullu sanilliullugit.

- Avannaata (innuttaapput 10.647 -t) – Siunnersuutigaat 4 –nik ilaasortaataitaqassasoq – inuup taneqartup “nalinga” 2.662-iuvoq

- Qeqertalik (innuttaapput 6.500 indbyggere) – Siunnersuutigaat 4 –nik ilaasortaataitaqassasoq – inuup taneqartup “nalinga” 1.625-iuvoq.



- Qeqqata (innuttaapput 9.239 -t) – Siunnersuutigaat 4 –nik ilaasortaatitaqassasoq – inuup taneqartup “nalinga” 2.310-iuvoq

- Sermersooq (innuttaapput 22.673-t) – Siunnersuutigaat 6 –nik ilaasortaatitaqassasoq – inuup taneqartup “nalinga” 3.779-iuvoq

- Kujalleq (innuttaapput 6.692 -t) Siunnersuutigaat 4 –nik ilaasortaatitaqassasoq – inuup taneqartup “nalinga” 1.673-iuvoq

Taamaattumik qanoq isumaqartoqarsinnaava periuseq tulluurtuusoq naapertuullunilu? Sooq innuttaasut ilaat allanit naleqarnerussappat, ilaallu nalikinnerullutik? Tassa naligiinneq eqqartorneqartartoq? Uanga naligiittoqarnersoq takusinnaangilara aamma arlaalluunniit silatuuliaq takusinnaangilara.

Demokraatini isumaqarpugut ullumikkut qinersinerni periuserput ingerlalluartoq aamma qujasuutigaarput taasinerit tamarmik naligiisinneqarmata. Qujanartumimk aamma naalakkersuisut taamak isumaqarput.

Taakkuugallarput oqallinnermi Demokraatiniit ilanngukkusutagut.